

# IANUARIUS

Die 11 Ianuarii

S. Theodosii, abbatis

*Ant. ad introitum*

Io 10, 14-16

**E**go sum pastor bonus: et cognosco oves meas, et cognoscunt me meae. Et alias oves habeo: vocem meam audient, et fiet unus grex, unus pastor.

*Collecta*

Omnípotens sempitérne Deus,  
lumen errántium et pastor óvium,  
concéde propítius, per intercessiónem sancti Theodósii, abbátis,  
qui pro fide cathólica tuénda, nec minas nec mortem tímuit,  
ut una fácias in te credéntes pietáte concórdes.  
Per Dóminum.

LECTIO PRIOR

« *Solliciti servare unitatem spiritus in vinculo pacis.* »

Léctio Epístolae beati Pauli apóstoli ad Ephésios 4. 1-6

Fratres :

Obsecro vos, ego, vinctus in Dómino, ut digne ambulétis vocatióne qua vocáti estis, cum omni humilitáte et mansuetúdone, cum longanimitáte, supportántes ínvicem in caritáte, solliciti serváre unitátem spíritus in vínculo pacis; unum cor-

pus et unus Spíritus, sicut et vocáti estis in una spe vocatiónis vestrae; unus Dóminus, una fides, unum baptísma; unus Deus et Pater ómnium qui super omnes et per ómnia et in ómnibus.

Verbum Dómini.

PSALMUS RESPONSORIUS

Ps 99, 2. 3. 4. 5 (R. 3c)

R̄. Nos pópulus eius et oves páscuæ eius.

1 Iubiláte Dómino, omnis terra,  
servíte Dómino in lætítia;  
introíte in conspéctu eius in exsultatióne. R̄.

2 Scitóte quóniam Dóminus ipse est Deus;  
ipse fecit nos, et ipsíus sumus,  
pópulus eius et oves páscuæ eius. R̄.

3 Introíte portas eius in confessióne,  
áttria eius in hymnis,  
confitémini illi, benedicite nómini eius. R̄.

4 Quóniam suávis est Dóminus;  
in ætérnum misericórdia eius,  
et usque in generatióne et generationem véritas eius. R̄.

ALLELUIA

Io 10, 27

R̄. Allelúia. Oves meae vocem meam áudiunt, dicit Dominus; et ego cognóscó eas, et sequúntur me.  
R̄. Allelúia.

EVANGELIUM

«Oves illas oportet me adducere et fiet unus grex.»

✠ Lectio sancti Evangélii secúndum Ioánnem 10, 11. 14-16

In illo témpore :

Dixit Iesus : « Ego sum pastor bonus : bonus pastor ánimam suam ponit pro óvibus. Ego sum pastor bonus : et cognosco meas, et cognoscunt me meae, sicut novit me Pater, et ego agnosco Patrem : et ánimam meam pono pro óvibus.

Et álias oves hábeo, quæ non sunt ex hoc ovili, et illas oportet me addúcere, et vocem meam audient, et fiet unus grex, unus pastor.

Verbum Dómini.

*Super oblata*

Sanctífica, miséricors Deus, hæc múnera, et præsta : ut beati Theodósii abbátis exémplo et intercessione, nosmetipsos tibi cum Christo simul offerámus.

Per Christum.

*Ant. ad communionem*

cf I Cor 10, 17

Unus panis et unum corpus multi sumus,  
omnes qui de uno pane et de uno cálice participámus.

*Post communionem*

Quæsumus, Dómine, ut sacraménta quæ sumpsimus, in hac memória beáti Theodósii, ad fraternitátis caritátem et ad fidei firmitátem proficiant.  
Per Christum.